

Saeh Maenh'ak Liuz Huzlanz Hawj Gou Gamjdoengh Lai

Gij goj boux hungmbwk Liuz Huzlanz, seiziq couh dingq daxboh daxmeh gangj gvaq. Liuz Huzlanz aen coh yiengsadsad neix caeux couh geiq youq ndaw sim gou maenhsud, gou maqmuengh caeux di ndaej doeg bonj saw gvendaengz Liuz Huzlanz.

Ngoenzneix gou dauqdaej caij-soiq ndei doeg daengz bonj saw neix, gij saeh maenh'ak Liuz Huzlanz ndaw saw sij haenx hawj gou gamjdoengh dangqmaz, aensim saenqdoengh gig haenq.

Liuz Huzlanz, dahniq ngamq ndaej 15 bi, hoeng de cix doiq gij saehnieb aen dangj gig cungsim, doiq yinzminz, doiq doengh boux gwzming dungzci wnq ndiepgyaez naeklaeg, youq dangqnaej vunzdig saeknaej mbouj bienq, mbouj lau dai saekdi, doeklaeng vut diuzmingh oiq swheij, vih gij saehnieb aen dangj caeuq yinzminz caenhsim caenhrengz, buekmingh daengz dai.

Gou cei q gamjdoengh dwg: Liuz

Huzlanz yaek deng gaj gaxgonq song ngveih lwgda de ndongq-gywggywg, caemhcaiq daengx dwk luenzlulu. Lumjnaeuz doiq vunzlai naeuz: De yaek caenda yawjraen vunzdig deng mied, yawjraen aen doih swheij hoenx hingz dauqma. Neix dwg gij saeh geijlai maenh'ak geijlai cigndaej haenhdanq ha.

15 bi, dwg duenh nienzgeij cei q gyaunde. 15 bi, raeuz lij youq henzndang bohmei yiengsoud ndwenngoengz vuenyungz! Mbouj you mbouj heiq doegsaw, gwndaen! Hoeng, Liuz Huzlanz cix deng vunzdig gaj dai, diuzmingh lixgyoeggyoeg ndeu couh baenzneix liux lo. Mauz Cwzdungh boux lingjiu hungmbwk raeuz, youq mwh geiqniemh Liuz Huzlanz sij naeuz: "Lix seiz hungmbwk, dai le miznaj." Gawq vah ndeu gyoeb gangj ok gij saeh maenh'ak Liuz Huzlanz.

Yienznaeuz Liuz Huzlanz dai lo, hoeng gij yienghsienq ronghlwenq gyaek guekgya gyaek lwgminz de, gij

cingsaenz mbouj fug mbouj lau de, seizseiz riuzcienz bouxboux haenhdanq, itcig gikcoi daih dem daih vunz vih lwgminz fouqmiz, guekgya hwnghuengh, vih guhbaenz gungcanj cuji daihdamj buekguh!

Doeg bonj saw neix liux, gou rox aen dauhleix ndeu: Gou sengmaj youq aen nienzdaeh hozbingz, mbouj miz doxdawz, mbouj miz hoenxcienq, gij vanzging yienghneix dwg ciencien fanhfanh bouxmaenh'ak guh gwzming lumj dahcej Liuz Huzlanz aeu lwedhanh, aeu diuzmingh vuenh daeuj. Mwhneix raeuz engq aeu insik gij ndwenngoengz ndaej daeuj mbouj yungzheih neix! Vihliux engq ndei bae vih vunzlai guh saeh, gou gietsim daj seiziq couh ndeindei doegsaw, hagrox gohyoz vwnzva cihsiz caeuq sevei cihsiz, lienh baenz bonjsaeh ak, laebhwnj gij yawjap cingq deng bae yawj saeh dingh saeh, mboujduenh muzlien gij cei qheiq swheij, yiemzgek iugouz swheij, caenndang



bae guh, hawj swheij coh aen muzbyauh cingq deng ndeu yamq bae. Vih hwnqguh sevei cuji yendaiva gien ok goengrengz caeuq dungxaiz.

(faenzcieng ndei gwnz muengx Vangz Gyanghmyauz/hoiz)

Sawqniemh Mizyinx

Seizdoeng haet ndeu, gou baez beng hai baengzcueng, couh yawjraen baihrog haumyanmyan liux. Hwnzlwenz doeknae, gofaex, dingjranz, gwnzhaw cungj longz geu buh hausagsag. Ndit baez ciuq, nae lwenqmyabmyab, daengx aen sei qgyai cungj bienq ndaej seuq-cengh youh gyaunde.

Gou angq dwk cing daxboh daeuj siujgih gvangicangz yawj nae. Sawqmwh, dingqny sing angqhemq: "Ndei gwn lai lo!" Gou baez yawj, raen geij daeg nyez iq gwn nae. Gou gig geizheih, hix siengj cimzcimz gij feih nae. Daxboh mbouj hawj gou gwn: "Gaej yawj nae baenzneix hau, gizsaed de mbouj seuq ne, hamzmiz haujai nengzbingh, mbouj ndaej gwn....." "Gou mbouj saenq!" Gou naeuz hawj daxboh, ngauzgyaeu laglag. Daxboh naemj-naemj le, naeuz: "Yienghneix raeuz guh aen sawqniemh ndeu."

Naeuz guh couh guh! Ma daengz ranz, dou ra aen doengj suliu seuq ndeu, aen vanj seuq ndeu, fag geb seuq ndeu bae geb nae. Gou bae geb gij nae gwnz daizva caengz miz vunz deng gvaq haenx, daegbied seuq. Ma daengz ranz le, gou dawz doengj nae cuengq henz feiz, hawj de yungz vaiq di. Caj nae cungj yungz baenz raemx le, daxboh couh heuh gou dawz raemx ndingq roengz ndaw vanj seuq bae. Caj geij faen cung hawj raemx caem le, gou yawjraen daej vanj miz doxgaiq caem.

Yawj daengz gij doxgaiq caemdaej neix, gou rox, mbouj naengz cimz nae lo. Gou miz di

doeknaiq. Daxboh naeuz: "Nae dwg dauqmingz, hoeng baihdaw de cix gig fukcab, gij saek rongh cienzbouh youq ndaw nae ciuq bae sinz dauq, gij rongh lai cungj saek haenx doxdaeb doxgap, couh hawj dou yawj gij nae lumj gig seuq nei. Hoeng, nae youq gwnzmbwn doek roengzdaej seiz, deng nem gij uq caeuq nengzbingh ndaw hoengheiq, ndigah nae mbouj naengz cigciep gwn. Mboujcix, gou cawx gaiq sietdiuz ndeu hawj mwngz gwn ba." Yienznaeuz mbouj ndaej cimz nae, hoeng ndaej gwn sietdiuz hix mbouj loek, gou angq dwk diuq hwnj sam cik sang.

Gwnzbiengz cien yiengh fanh yiengh, raeuz mbouj ndaej doq yawj doq saenq liux. Gou naemj, "gaej yawj najraemx bingz lumj gingq, aeu yawj lajraemx laegluemluem" couh dwg naeuz aen dauhleix neix ba!

(Mung Swjgiz)



Siujmeij



Youh dwg singhgiz roek aen lajbyonghngoengz ndeu, gou hai conghecueng, sup gij heiq singhsien, ngienx gyauej muengh raen gwnzmbwn miz bang roeg ndeu mbin cwxcaih raixcaix, gou couh dwendaug gienh saeh siengsim seizgonq haenx.

Bi' gvaq seizhah, daxboh daj diegrog dawz duz roeg ndeu ma ranz, duz de baenzndang cungj dwg saek henj lumj gim, lumj duenh nei, song lwgda lumj rinbauj yienghhaenx ndaemndongq, aen bak youh iq youh soem de dwg saek henj lumj makdoengj, song diuz nyauj youh iq youh hausaksak haenx gig dwggyaez. Gou an aen coh heuhguh "Siujmeij" hawj de.

Hainduj, "Siujmeij" aiq mbouj hab'wngq youq ndaw loengz ciengx, gou baezbaez bae gueng de, de couh "caca" swenjingaungau, swenj hwnjdaej cungj mbouj rox dingz, lumjnaeuz de "gangyi" deng gyaeng youq ndaw loengz, gou couh dwk

gijgwn hawj de le, caiq ciengq go diuq foux hawj de yawj, lij guh coujnaej daeuq de, caemhcaiq gangj gak cungj saeh mizyinx hawj de dingq. Gvaq geij ngoenz le, aiq dwg gou yienghneix guh gamjdoengh de lo, aiq dwg de hozhep lo, gou bae gueng de seizhaenx, de mbouj caiq swenjingaungau "gangyi" lo. Geij ngoenz roengzdaej, dou baenz baengzyoux ndei lo. Ngoenznaengz gyanghaet, "Siujmeij" cungj aeu gij sing seksak de heuh gou ndiu, gou ngoenznaengz hix ciuqseiz bae gueng de.

Miz ngoenz ndeu, gou youqndwi mbouj miz maz guh, couh dawz mbaw bauqcej daeuj yawj, gou raen gwnz bauqcej miz geij cih saw hung wenjda: Baujhoh duzroeg, bouxboux miz cwzyin. Aen sim gou lumj deng bien fad mbat ndeu nei. Gou laeglemx ok yangzdaiz bae, yawjraen "Siujmeij" youq ndaw loengz muengh gwnz mbwn, gij yiengh de youh ngaekz youh siliengz. Daengz banringz le, gou dawz gijgwn dwk daengz dangqnaej "Siujmeij", daej-saekwk doiq de naeuz: "Gwn ha, gwn ha, gwn donq neix le, donq laeng aeu gag ra gwn la....." De gwn imq le, gou gaeb de ok loengz daeuj, hai conghecueng le, naeuz "bae ha", de coh gou ngaekngaek gyauej, "gigi" heuh song sing, mbin bae lo. Bae la bae la, rim cib ndwen la! Dou haethaemh doxyouq cukcuk cib ndwen ha, "Siujmeij" mbouj nyeux gyauej yawj gou couh bae lo. Gou roxsingj gvaqdaej, raemxda gaeng lae baenz benq lo.

Gou caensim hohfuk "Siujmeij" vuenyungz angqyangz.
(Meijwvwn/raiz Yinj Fuzgen/hoiz)